



學泐學飛

四季有新穎(inn)的向望，有落葉的滄涼。春天花蕊朱朱紅，山頂散步鼻花芳；熱天日頭熱炎炎，溪底拍滂透心涼；秋天山坪滿莖芒，深山浪漫楓樹紅；冬天寒風冷霜霜，落葉樹桎添悲情。

四季有性命的循環，有對囡兒的疼痛。春天蝴蝶雙雙飛，樹跤花下說情話；熱天後嗣膨膨大，大隻細隻拖規掙；秋天菜鳥轉大人，揣伴聯姻好生湊；冬天萬物恬寂寂，等待春天閣到位。

我上愛熱天看魚仔學泐、鳥仔學飛，因為個拄開始咧學，跤手慢鈍，動作誠生疏，不時脫簍足古錐。就若像少年囡仔全款，咧走揣自己。我看對溪裡，大尾鯽仔魚的身軀邊圍一大陣細尾魚仔，細細步愛綴路；我看對樹林看向天，鵪鶉、長尾山娘、客鳥、白翎鷺……定定是規陣咧學飛天鑽地，細隻鳥仔飛甲歪膏擱斜足古錐。熱天的日時，予我看著做人媽媽教囡的先苦而後甜。

熱天的日時實在熱甲欲死，閣因為愛嬌驚日時出門，皮膚無細膩會去予曝甲烏焦去，我會恰暗光鳥全款，日頭落山，抑是天星照埕，才出來踏暗路散步四界行。我逐擺攏佇暗頓食飽、款閒了後，孤一人佇阮兜附近的溪仔邊散步，予無閒一工暫無停的頭殼有一个歇喘冷靜的機會。暗時溪邊的涼風微微，翕佇體內的火氣艱苦擺會走無去，路邊白白芳芳的蝶仔花，若像咧共我捫芳水。這是我熱人一工內底，上大的享受，行出門埕，無人攪吵，毋免管翁管囡管個欲按怎，只要一步一步行，真緊就會當感受我猶是我。

魚仔教囡泐，鳥仔教囡飛，無閒頓頓，恁敢有歇喘的機會？敢有予家已有泐來泐去、飛來飛去的自由？敢會像我全款，日時暗時散步溪邊走揣自己？嗯！查某人嘛是愛學泐學飛……

作者：王秀容

☆詞彙學習☆

【拍滂】pah-phōng：打水花

【暗光鳥】àm-kong-tsiáu：夜鷺

【脫簍】thut-tshuê：出差錯、出狀況

【歪膏擱斜】uai-ko-tshih-tshuàh：歪七扭八

☆文法學習☆

【無閒頓頓】：在單音節形容詞之後加上重疊的譬況詞，如「燒滾滾、白蔥蔥」等，是常見的疊詞方式，這也可以用在雙音節形容詞，同樣可以表現比較生動的形容，除了本例，又如鬧熱滾滾、清氣溜溜等。